

Og Sulat ni Jems

Og Piuna Talu' pa'ali sog Sulat ni Jems

Si Jems og kongudan ni Isus bianan sog gina' non sog ginungod. Ion og migokbit dia sog gotowanan nog tinumud na dia ni Isukristu sog koliwagan bonua nog Jerusalem.

Og sulat ni Jems koni posungu' sog glam nog gotowanan kitu' dia sog bansa Hudiu nog tinumabuk na dia ni Isukristu. Sa'an sinulat ni Jems og sulat non koni po' ponadan non ilan pa'ali sog polomotadon nilan, sog glangkalangka otawaka ginang nilan, bu sog kopoktalu' nilan. Miktalu' ion nog bila og gotow nog mingandol na dia sog Mikpongon, sumboy molongas og bolotabat non bu og kohinangan non. Po' bila ondi' motongow sog ginang non og tud non sog Mikpongon, da'idun da og doksu' nog tud non koyon. Og ma'ana nini, bila og gotow nog mingandol na dia sog Mikpongon sumboy motongow nododa' dia sog kohinangan non.

1. Og bokna nog sulat koni, 1:1.
2. Og kopongandol bu og kotoan, 1:2-8.
3. Og komiskin bu og daya, 1:9-11.
4. Og suloy bu og gyuba', 1:12-18.
5. Og mokinongog bu og moginang, 1:19-27.
6. Og pidonsama' tumalu' sog kopogbigya', 2:1-13.
7. Og tud bu og ginang, 2:14-26.

8. Og poktanud dia ni Isukristu bu og baba' non, 3:1-18.
9. Og poktanud bu og dinunya, 4:1-5:6.
10. Gininisan nog pomalianan, 5:7-20.

¹ Akon si Jems og sinumulat nog surat koni. Og sosoligan u nog Mikpongon bu Kounutan ta nog si Isukristu.

Og surat u koni posungu' dia sog glam nog Hudyuanan nog pigotowan nog Mikpongon nog mikpokpola' dia sog ainain nog bonua.

Og popia mongon daniu dion.

Na' amu mondok nog suloy

² Pigilugan, sumboy mogda'da' amu dun nog minsan olo og ginis nog suloy og kobianbisanan niu. ³ Po' kisunan niu nog bila sinulayan og kopongandol niu, og doksu'an non mimung nog ompayat og kopoglogaga niu dun. ⁴ Bu sumboy kobon non moglogaga amu po' bagun da og doksu'an non mimung nog da' na sila'on daniu bu motoktub na og kopongandol niu. ⁵ Tibua, bila ngon dion niu nog kurang pa og kotoan non, sumboy mongoni ion dia sog Mikpongon po' kobogayan da ion dun. Po' og Mikpongon motawal bu di' moksa'utsa'ut. ⁶ Bu bila mongoni ion sog Mikpongon, sumboy tumud bu di' nododa' ion mogdua'dua'. Po' ain mogdua'dua' kitu', mama' ilan nog nabok nog inoyupan nog galu'. ⁷ Og gotowanan koyon nog ma' nion, mogdodama ilan si'oy, di' ilan da kobogayan dun nog Pogbaya'. ⁸ Po' og gotowanan koyon, di' kosoligan og pikilan nilan bu ondi' ilan nododa' kosoligan nog minsan olo og ginang nilan.

⁹ Sumboy mogda'da' og pigilugananan ta kitu' sog tanud nog miskinan, po' motas ilan da dia sog motaan nog Mikpongon. ¹⁰ Bu og pigilugananan ta kitu' sog tanud nog doyahan, sumboy mogda'da' ilan dosop minsan si'oy ombaba' ilan dia sog motaan nog Mikpongon. Po' ilan si'oy, matoy ilan da ma' nog bulakbulakanan kitu' dia sog sigbotan. ¹¹ Po' bila kinitan na nog podos og bulakbulakanan koyon, molanos na mangka koloklag, bu mimung nog di' na omba'is pogbontayan. Domikian da ma' nion og pongdoyahananan koyon. Sonuk nilan si'oy monamal moksukat nog daya nilan, matoy ilan da.

¹² Mogda'da' og gotow kitu' nog mokogaga nog suloy. Po' bila mokogaga da ion, tumbasan nog Mikpongon nog kotubu' kitu' nog da' kopus non, og pinasad non kitu' nog bogoyon non dia sog ain molalam dianon. ¹³ Bu bila og gotow pongyuba'an, sumboy ondi' ion mokpikil nog gyuba' koyon dia miktidu sog Mikpongon. Po' og Mikpongon ondi' mongyuba' bu di' dosop koyuba'an nog molaton. ¹⁴ Suga'id non, sa'an koyuba'an og gotowanan po' moit ilan nog dili glegan nilan nog di' pia. ¹⁵ Og doksu'an nog glegan nilan kitu' nog di' pia, og dusa. Bu og doksu'an nog dusa nilan koyon og patoy.

¹⁶ Dadi pigilugan ku nog bololaga' dianakon, bagun amu ondi' kolimbungan, ¹⁷ sumboy kosunan niu, og sosuku nog molongas bu og sosuku nog da' sila'on dun, miktidu dia sog Mikpongon. Bu ion og mikpongon nog glam nog miglamag koyon dia sog glangit. Bu ondi' ion moksop

otawaka ondi' mokpinda. ¹⁸ Og glegan non dianita nog bogayan non ita nog kotubu' kitu' nog da' kopus non bianan sog motud nog talu' non, bagun ita da mokuna dia sog glam nog piongon non mogbogu kotubu'.

Kona' tibua mokinongog amu, suga'id non, pokokunut amu dosop

¹⁹ Pigilugan ku nog bololaga' dianakon, poktitukoy niu ini. Sumboy glam niu mokpahatul mokinongog bu na' amu mondodali' moktalul otawaka moglolingit. ²⁰ Po' bila gotow moglolingit, ondi' mogdoksuan sog kodulusan nog saka ma' nitu' bosia og glegan nog Mikpongon dianita. ²¹ Dadi, lota' amu na moglokohinangan nog glam nog kohinangan nog sinoitan otawaka di' pia nog alu'alu' poginangon niu. Bu sangkan amu na dia sog Mikpongon bu unutul niu na og talu' non kitu' nog motud nog inungod non na dianiu, po' kitu' og tabang niu.

²² Bu na' niu tibua pokinongogan og talu' kitu', bagun amu ondi' motipu nog long niu dun mikokunut amu na. Suga'id non, potintu niu og kopokokunut niu nog talu' nog Mikpongon kitu'. ²³ Po' simasima mokinongog tibua nog talu' non kitu' saka da' non da unutoy, mama' ion nog gotow kitu' nog minolamin. ²⁴ Tubus non solominoy og bayu'bayu' non, ampun ompanow ion, kolingawan non mogdayun bog olo bayu' nog bayu'bayu' non kitu'. ²⁵ Tibua, og gotow kitu' nog kobon non pogimotimoton non og botad kitu' nog boya'an molokat og gotowanan dun tidu sog baya' nog dusa, bu ondi' non poksolingawan

og talu' kitu' nog midongog non, mangka non unutoy, popiaon ion nog Mikpongon minsan olo og poginangon non.

²⁶ Bila ngon gotow nog momikil nog ompagon na og tanud non, saka ondi' ion moto mogokbit nog baba' non, og ma'ana non, linimbungan non og dili glawas non, bu og tanud non kitu' da' sagnat non. ²⁷ Suga'id non, dia sog motaan nog Gama' ta nog Mikpongon, ma' nini og bayu' nog motud nog tanud nog da' sila'on dun. Ain migusiba' kitu' nog bata'iluanan bu og baluli-bunanan nog kilogonan, bu mogolig nog ain di' pia dini sog kilawan, motud og tanud non bu da' sila'on dun.

2

Na' amu mogbigya'

¹ Pigilugan ku, bila ma' nion tinumud amu noma dia sog kounutan ta nog si Isukristu nog ion og motas sog glam non, sumboy da'idun og pogbigya'on niu nog pakasiotow niu. ² Sopolati non, ngon og dua' kotow mampu' dia sog glumpuk niu. Sala kotow koyon miminolok nog bulawan bu minapot nog mokologan. Sala kotow sop koyon, og miskinan bu og ponopoton non og danul. ³ Bila bigya'on niu og ba'asa niu dianilan, nog og minapot koyon nog mokologan, pingkudon niu ion dia sog omba'is nog gingkudan, saka tolu'an niu og miskinan kitu' nog, "Dion ka na pogindog" otawaka, "Dion ka ingkud sog sugudsugud," ⁴ og ma'ana non, migbigya' amu dia sog pakasiotow niu. Sa'an itu' ma' nitu'

og kopogokbit niu dianilan po' sabap sog pikilan niu kitu' nog di' pia.

⁵ Pigilugan ku nog bololaga' dianakon, poki-nongog amu. Og miskinananan koyon dini sog dunya koni, pinili' ilan nog Mikpongon nog mogdaya ilan nog kopongandol nilan dianon, bu ngon og malap nilan nog popia sog pigdotu'an nog Mikpongon. Po' ma' nitu' og pinasad non dia sog ain molalam dianon. ⁶ Tibua, pinompola' niu og miskinananan. Kona' ta' da gidoy nog kipihtan amu sabap sog doyahananan koyon? Otawaka, kona' ta' da gidoy og doyahananan og mokoit daniu ditu' sog gukum? ⁷ Ilan tanan og sinumolap kitu' monalu' dia sog ngalan nog Kounutan niu kitu' nog molongas.

⁸ Tibua, og modulus amu dun bila kobon non munut niu og motas kitu' nog botad sog glam non nog sinulat dia sog Kitab nog, "Sumboy molalam amu dia sog sumbaloy niu mama' da nog glolaman niu sog dili glawas niu."* ⁹ Tibua bila mogbigya' amu, mokodusa amu dun, bu kimotudan amu nog talu' kitu' dia sog botad nog da' amu doda' pokokunut dun. ¹⁰ Po' minsan si'oy mikokunut amu bosia sog glam nog botadanan kitu' nog saka ngon soginis og da' niu kunut dun, og ma'ana non, da' niu da kunut og glam non. ¹¹ Po' og Mikpongon og migondi' sog gotowanan nog, sumboy da'idun og momabal nog duoy nog pakasi non. Ion dosop og migondi' nog, sumboy da'idun momunu'. Dadi, minsan si'oy di' amu momabal nog duoy nog duma niu,

* **2:8** 2:8 Levitikus 19:18

saka momunu' amu da, og ma'ana non, da' niu da kunut og glam nog botad kitu'.

¹² Dadi, sumboy potubudan ta og ponginangon ta bu og ponolu'on ta po' tontongan dianita bog miunut ta dota' da og botad kitu' nog boya'an molokat og gotowanan dun tidu sog baya' nog dusa. ¹³ Po' ain ondi' mololat sog duma non, ondi' dosop ion lolatan sog matong ukumon ion nog Mikpongon. Dadi, ain og linumolat dia sog duma non, di' mondok nog gukum nog Mikpongon.

Na' amu moktalu' nog tinumud amu, saka di' motongow dia sog kohinangan niu

¹⁴ Pigilugan ku, olo gidoy og doksu'an nog gotow koyon nog sagya tibua moktalu' nog ion tinumud sog Mikpongon nog saka ondi' motongow sog kohinangan non? Bila ma' nitu' og bayu' nog kotud non, motabang dota' gidoy ion? Ondi' le. ¹⁵ Po' sopolati non, ngon og pigilugan ta sog tanud nog da'idun koponapot non, bu da'idun ponganon non. ¹⁶ Bila mongoni ion daniu, saka tolu'an niu tibua ion nog, "Panow a na, po' mongon da dianika og koponapot mu bu kokan mu," saka ondi' niu ion tobangan, og talu' niu koyon da' sagnat non. ¹⁷ Domikian da ma' nitu', bila moktalu' ita tibua nog tinumud ita sog Mikpongon saka da'idun da og kohinangan ta dun, da'idun da og sagnat non.

¹⁸ Ngon gotow moktalu' nog ion tinumud. Ngon sop og moktalu' nog ion, og ginangon non ain molongas.

Dadi, takun dow buan, potongow mu dow dianakon bog olo bayu' nog kopongandol mu koyon nog da'idun kohinangan mu dun, po' potongowon ku sop dianika bog olo og bayu' nog kopongandol u bianan sog kohinangan ku. ¹⁹ Omba'is nog tinumud amu nog solabuk da og Diwata nog ion non og Mikpongon. Tibua, minsan si'oy og glatdiwataan koyon, tinumud ilan dosop dun bu mondok ilan tanan dun. ²⁰ Mosobu' u doda' daniu. Di' pota' motampal daniu nog da' sagnat nog tud niu koyon bila di' da motongow dia sog kohinangan niu nog molongas? ²¹ Og mogulang ta kitu' nog si Apu' Abraham, iningolanan ion nog midulus dangan pinalas non og bata' non kitu' nog si Isak. ²² Dadi, motampal dianita nog sa'an ininang non ma' nitu', po' sabap sog kopongandol non dia sog Mikpongon. Og ma'ana non, og tud non kitu' mitoktub bianan sog gininang non kitu' ²³ bu mituman og talu' dia sog Kitab nog, "Tinumud si Abraham bu bianan sog kopongandol non kitu', iningolanan ion nog midulus."† Bu iningolanan dosop ion nog sopali nog Mikpongon. ²⁴ Dadi, domikian da ma' nitu' nog motampal na daniu nog og gotow modulus bianan sog kohinangan non, kona' tibua sagya sog tud non.

²⁵ Ma' dosop ni Rahab nog tungkagon kobon nitu'. Ion si'oy, iningolanan dosop ion nog Mikpongon nog midulus sabap sog kotolima' non mahatul sog dodondagonanan kitu' nog Hudyu bu tinobangan non ilan sog kopolaguy

† **2:23** 2:23 Genesis 15:6

nilan bianan sog kotondu' non kitu' dianilan nog dalan. ²⁶ Dadi, og kopongandol nog di' molangka, da' doksu' non. Mama' da' nog glawas, bila da' ginawa non, minatoy na.

3

Na' niu solapon gumamit og baba' niu

¹ Pigilugan ku, mika'an da bosia og mimung nog polopanad daniu. Po' kosunan niu nog og polopanadanan mama' nami, modilis pa og koukuman dianami sog duma gotowanan. ² Po' glam ta alu'alu' molapang. Bu bila ngon og gotow nog da'idun og glopangan non dia sog kopoktaluh non, og ma'ana non, da' tokodoy sila'on dianon po' moto mogokbit nog glam nog glegan nog dili glawas non. ³ Bila togu'an ta nog kakang og baba' nog kuda', mogbilang dianita og kuda' koyon nog minsan ain ta posungu'oy. ⁴ Ibalat da sog pologata, minsan si'oy mosolagon bu oyupan nog molandos nog galu', kobonsalanan da minsan si'oy bata'bata' og bonsalan non. ⁵ Domikian dosop ma' nog baba' nog gotow. Bota'bota'on si'oy, modasig mogbonsag.

Pikil niu polo'ma, nog solongow si'oy og son-tikan mokotutung na nog gliwag nog tolunan. ⁶ Og baba' nog gotow mama' dosop nog gapuy. Po' sog glam nog polongkapan nog glawas, bianan da sog baba' nog gotow, motongow bog andun kolaton og dialom pikilan non. Bu bianan dosop sog baba', og tibuk nog glawas non mimung molaton. Bu kona' tibua nitu', po' asta og glam nog kobianbianan non dini sog dunya

mogla'at dun. Og piktiduan nog kolaton non koyon, dia sog danow kitu' nog gapuy. ⁷ Tidu sog kobon nitu' asta sog numun koni, mitagam da nog gotow og gininisan nog manusia'anan nog dia sog gawang, bu sog glupa'an, bu sog dagat. ⁸ Tibua, ondi' ombokbit nog gotow og dili baba' non. Bianan sog baba' non mologon non kotigoloy og sumolap monalu' bu mokolala nog ponolu'on. ⁹ Bianan dia sog baba' nog gotow mokopoksanglit ion dia sog Pogbaya' bu sog Gama' ta nog Mikpongon. Bu bianan sog baba' koyon, mokoponuyud og gotow dia sog pakasi non nog saka og pinuyudan non kitu' inimung ilan ma' nog bantuk nog Mikpongon. ¹⁰ Og ma'ana non, tidu sog solabuk baba' mongon sanglit bu tuyud. Pigilugan ku, ondi' ion mogusoy. ¹¹ Mokosigob ita ta' gidoy nog tubig nog motobang bu og madowadow nog solabuk da nog tobud og piktiduan non? ¹² Pigilugan ku, og sopun kayu mogbunga ta' gidoy nog bunga bolagon? Ondi' le. Bu ondi' dosop mosigob og tubig nog motobang dia sog tobud nog madowadow.

Na' amu mogolulud nog kotoan nog sagyao-tow, suga'id non, og kotoan nog tidu sog Mikpongon

¹³ Ngon ta' togo kotoan bu togo sabut dion niu? Bila ongon, sumboy potongowon non bianan dia sog polomotadon non nog molongas bu sog kobaba' nog bolotabat non nog miktidu dia sog kodalom nog kotoan non. ¹⁴ Tibua, bila moktagu'tagu' amu bu mogdalul amu, otawaka

ponontongon niu ain da og kosu'atan dun og dili glawas niu, sumboy di' amu mogbonsag bu di' niu poglingodon ain motud. ¹⁵ Bila ma' nitu' og bayu'bayu' nog kotoan niu, da' itu' poktidu sog glangit, suga'id non, dini da miktidu sog kinilawan, bu sog ginungod, bu dia ni Kindagow. ¹⁶ Po' ain mima bu ponontongon non ain tibua og mosulut dia sog dili glegan nog glawas non, og doku'san non og sasow bu glam nog gininisan nog sinoitan. ¹⁷ Tibua, og kotoan kitu' nog miktidu ditu' sog glangit, og doku'san non, tagna' molonu', bu motikna', bu moto sumungod, bu moto sumangkan, bu molilolatoy, bu molongas og kohinangan non, bu di' mogbigya', bu motantu pikilan non. ¹⁸ Og moglogomigus, bila moginang ion nog molongas dia sog pakasiotow non, og doku' non og kodulusan.

4

Na' amu sumangkan dia sog pikilan niu, suga'id non, sangkan amu sog Mikpongon

¹ Olo gidoy piksobapan nog susian niu koyon nog boya'an miksosugutoy amu dun? Kona' ta' gidoy ion sabap sog glegan nog dili gungod niu nog moleg mogbaya' dia sog dialom pikilan niu? ² Moleg amu bosia kongonan, tibua di' amu mokalap dun. Dadi og pondayan niu dun, momunu' amu. Mima amu, tibua di' amu mokalap dun. Dadi, moksusi amu bu mongagow amu. Sa'an di' amu mokalap nog ain glegan niu koyon po' di' amu buan mongoni dia sog Mikpongon.

³ Bu bila mongoningoni amu dianon, di' amu

kobogayan dun po' di' pia og kogomitan niu pa'ali sog pingoni niu kitu'. Po' gomiton niu tibua itu' bagun da kosu'atan og dili glawas niu dun.

⁴ Mama' amu nog kolibunanan kitu' nog di' kosoligan nog duoy non. Da' niu ta' kosunoy nog bila omba'is niu og kinilawan, mimung nog ombanta niu dun og Mikpongon? Ain og moleg sumolabuk sog kinilawan mimung nog ombanta non dun og Mikpongon. ⁵ Balu' niu dun, da'idun ta' og talu' nog Kitab pa'ali sog ginawa ta koni nog binogoy nog Mikpongon dianita nog mosompun ita koit nog glegan sog kinilawan. ⁶ Tibua, labi pa ditu' og tulung nog Mikpongon dianita. Sa'an itu' ma' nini sinulat sog Kitab, "Og Mikpongon, ontuan non ain bugalon, tibua, ain ombaba' bolotabat non, tulungon non."*

⁷ Dadi, sangkan amu dia sog Mikpongon. Ontuoy niu si Kindagow bagun ion mawa' diani.

⁸ Pokpolani amu dia sog Mikpongon po' og Mikpongon mokpolani dosop diani. Bu ain og bolodusaon, sumboy lumota' amu moginang nog dusa. Bu ain mogdua'dua' sumboy potintuon non og pikilan non. ⁹ Potongow niu og koplila' niu bianan dia sog kolangos niu. Kolele nog kotowaan amu, sumboy moksogow amu. Kolele nog mogda'da' amu, sumboy mosusa amu.

¹⁰ Sumboy mokpobaba' amu poguna dia sog Pogbaya' bagun non amu potason.

¹¹ Pigilugan, na' niu tolu'an og duma niu nog mondom mogla'at dun. Po' ain moktalul'

* 4:6 4:6 Proverbs 3:34

nog mondom mokopogla'at dia sog pakasi non otawaka ukumon non og duma non, og ma'ana non, og lina'at non bu og ukumon non koyon, og Botad kitu' nog miktidu sog Mikpongon. Dadi, bila ukumon niu og duma niu bianan sog kogamit niu nog Botad kitu', amu si'oy da' amu da pokokunut dun. Suga'id non, inimung niu og glawas niu nog polongukum. ¹² Saka og Mikpongon da og migbogoy nog Botad, bu sala non da og Polongukum. Ion da togo baya' gumawon nog gotowanan, otawaka ion dosop og togo baya' luma'at dun. Tibua amu, sima amu buan nog mogbaya'baya' mongukum nog pakasiotow niu?

¹³ Pokinongog amu ain mokpoktaluh kitu' nog mama' nini, "Gondow koni, otawaka boloma' mangoy u dituh sog len bonuaan. Mogonong u pa dituh laga' si'oy nog soton poh moksukatsukat u pa dituh bagun u mokosin." ¹⁴ Iduma momikil amu ma nog mama' nion, nog saka di' niu tanan sunan og boloma'dinglag niu? Og kotubuh niu dini sog glupa'an koni podali' da ma' nog gabun. ¹⁵ Suga'id non, ma' nini bosia og tolu'on niu, "Bila glegan da nog Pogbaya', motubuh u bu ma' nini og ginangon ku." ¹⁶ Saka mogbonsag amu ma bu mogbugalbugal amu ma. Og ma' nion koyon ondi' pia. ¹⁷ Dadi, ain kosunan non og omba'is kitu' bosia inangon, nog saka ondi' non inangon, mimung mikodusa ion dun.

5

Na' amu sumalig sog daya niu

¹ Numun kitu' pokinongog amu nosop, amu doyahananan. Ponglangos amu na po' posungu' amu na dotongan nog sinsaan. ² Og daya niu koyon migla'at na bu asta ponopoton niu pingokot na nog gangnay. ³ Minsan og bulawan bu og solapi' niu da' na golaga' non, bu miimung tanan itu' nog taksi', nog amu doda' mabak amu nog boya'an polihola'on amu tanan dun. Minsan si'oy dali' na bungkas, mogomud amu pa nog daya niu. ⁴ Tontong niu polo'ma. Og linimbung niu koyon, koyon og mokotaksi' nog da' niu toktuboy og tindanan niu dia sog gotowanan kitu' nog moginang sog glupa' niu. Og Mikpongon nog ion Pogbaya' sog glam non, midongog non na og kopokitabang nog gotowanan kitu' nog minggonian dianiu. ⁵ Molongas na og kopogonong niu dini sog dunya koni po' da' na og pogonda'on niu, bu minang niu na minsan olo og glegan niu moginang. Pikpolombu' niu og dili glawas niu nog saka dali' na datong og gondow nog gla'at. ⁶ Sabap dianiu pinolihala' bu pimunu' og gotowanan nog da' sala' nilan bu da' ilan pongantu dianiu.

Na' amu mosusa bila kobianan amu nog sinsaan

⁷ Dadi pigilugan, popayat niu og ponutus niu asta sog matong og gondow nog pokpuli' dini nog Pogbaya'. Ibalat da sog boloinang sog glupa', pigbogadan non nog gonion og pomulan non koyon bu migdodama ion nog dupi' bagun omba'is og tubu' nog pimulan non koyon. ⁸ Domikian dosop nog ma' nitu' og ponutus niu. Bu popagon niu og

pikilan niu po' dali' na og pokpuli' nog Pogbaya'.
⁹ Dadi pigilugan, na' amu moginitungoy, bagun amu ondi' ukumon nog Pogbaya' po' dion na og Polongukum. ¹⁰ Pigilugan, og pononggi'an ta ma' nog polomolatasanan kitu' nog mikpolatas nog talu' nog Mikpongon kobon nitu' nog ompayat og ponutus nilan sog sinsaan nilan. ¹¹ Kisunan niu nog ain mikogaga, itungon ta ion nog ki-untungan. Midongog ta pa'ali sog kopoglogaga ni Job, bu og doksu'an nog kopoglogaga non kitu', bu bog olo og bayu' nog tabang nog Pogbaya' dianon. Po' og Pogbaya' molilolatoy bu molitobangoy.

¹² Bu pigilugan, sog glam non, na' amu tokodoy moksapasapa sog glangit, otawaka sog glupa'an, otawaka sog minsan ain. Suga'id non, talu' niu ain motud. Bila di', sumboy ondi' na doda'. Bila o'o, sumboy o'o na doda'. Bila di' ma' nitu' og ginangon niu, mimung polihola'on amu dun.

Na' amu mogdua'dua' sumabi sog Mikpongon, po' bianansog kopongandol niu, tobalon non og gyakin niu

¹³ Ngon ta' og kilogonan dion niu? Bila ongon, sumboy mogyakin ion dun. Ngon ta' migda'da'? Sumboy mogbobat ion nog sanglit non sog Mikpongon. ¹⁴ Ngon ta' di' mokodag dion niu? Sumboy polumpukon non og gotowanan kitu' nog ginolal nog mogbogolal sog tanud bagun nilan kopogyokinan bu lonaan nilan ion bianan sog ngalan nog Pogbaya' dianita nog si Isus. ¹⁵ Po' og gyakin nilan koyon nog bianan dia sog kopongandol mimung kumodag

og gotow kitu' dun. Og Pogbaya' muat dianon tidu sog di' non koyon kokodag. Bila di' mokodag sabap sog dusa non, longgungan dosop ion dun. ¹⁶ Dadi, poglinila'oy amu nog dusaanan niu, bu pogyinokinoy amu dosop bagun da moksud ma' nog dan og nanam niu. Po' og gyakin nog gotow nog midulus modasig bu tobalon nog Mikpongon. ¹⁷ Po' ibalat da dia ni Iladya kobon nitu', ion mama' nita nog sagaotow da. Pigyokinan non tokodoy nog di' mogdupi'. Bu onda' podupi'oy nog Mikpongon laga' nog tolu ton bu moginonga'. ¹⁸ Tubus nitu', pigyokinan non nosop nog mogdupi' na bu pidupi' doma nog Mikpongon boya'an sinumongku' og glam nog pomulan.

¹⁹ Pigilugan ku, bila gomonsunoy ngon og pakasi niu poktanud nog misimoy dia sog motud, saka ongon duma niu sog tanud nog mokpontonul dianon bagun ion mokopuli' sog motud, molongas tokodoy og kodoksu'an non. ²⁰ Po' na' niu poksolingawan nog simasima og tumabang sog bolodusaon nog bagun moksop og pikilan non kitu' nog molaton, og ma'ana non mogawon og gotow kitu' dun tidu sog gla'at bu kompunan ion nog dusaanan non.

**Kitab Bogu Pasad talu' nog Mikpongon
Subanon, Western: Kitab Bogu Pasad talu' nog
Mikpongon New Testament**

copyright © 1996 Wycliffe Bible Translators, Inc.

Language: Subanon, Western

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 7 Nov 2023 from source files
dated 29 Jan 2022

04701be4-22cc-51ef-baf5-706018256e87